

Dan planete Zemlje

Investicije za budućnost

- 22.04.2022. godine -

Davne 1969. godine prvi puta je prezentovana ideja obilježavanja Dan planete zemlje u Sjedinjenim Američkim državama na UNESCO-voj konferenciji. Tek je godine 1992. na konferenciji o okolišu i razvoju Ujedinjenih nacija u *Rio de Janeiro*-u donesena službena odluka o obilježavanju dana koji ima program obnove i održivi razvoj našeg planeta.

Čovjek je svojim djelovanjem industrije i potrošačkim navikama utjecao na promjene koje se dešavaju u ekosistemu zemlje. Od klimatskih promjena do izumiranja biljnih i životinjskih vrsta čovjek je značajno promijenio obilježja prirode koja je čovjeku neophodna za preživljavanje. Uništena je jedna petina tropskih šuma u Amazoniji, odnosno oko 743 hiljade kvadratnih kilometara. Prema podacima Međunarodne unije za očuvanje prirode (IUCN), preko 40 hiljada vrsta je ugroženo i prijete im nestanak. Od toga su 14 procenata vrsta ptice, 26 sisari, a 40 procenata su vodozemci, dok je u novijoj historiji 897 vrsta životinja potpuno izumrlo i nestalo.

Bez biljaka ne može se proizvoditi kisik koji je prijeko potreban svim živim bićima na zemlji. Ispušni plinovi koji dolaze od industrije i automobila značajno su promijenili klimatsku sliku planete negativno djelujući na ljude i ukupni živi svijet. Brojna testiranja nuklearnih eksplozija također su utjecala na promjenu klimatskih ekosistema. Topljenje ledenjaka dovodi do podizanja razina oceana i mora, stvarajući razorne tsunamije i razorne morske struje. Dan planete zemlje nas podsjeća, upozorava na sve to.



Pojedinci imaju jednostavnu, ali efikasnu ulogu. Ono što svako radi i kako to čini, koje izbore pravi i kako djeluje ima ogroman uticaj na ekosisteme, ali i na tempo korporativnih i vladinih aktivnosti.

Potrebne su nam promjene koje će preokrenuti naše djelovanje i razmišljanje kako bismo transformisali negativne promjene koje se dešavaju na planeti Zemlji. Inovacije u privatnom sektoru uz podršku javnosti pospješuju ubrzane i neophodne promjene bolje nego bilo šta drugo. Već je poznato da se takvo poslovanje i isplati, ističe se na platformi Svjetskog dana planete. Studije su pokazale direktnu povezanost između održivih poslovnih praksi, cijena akcija i poslovnih performansi.

I vlade i kompanije i pojedinci strahuju od promjena, ali se status quo u savremenom načinu života transformiraše pred našim očima. Neophodno je da se dostigne neto nula emisija gasova staklene bašte do sredine vijeka, kako bi se globalni rast temperature održao ispod 1,5 stepeni Celzijusa.



Toksični otpadi utječu i na biljke, na životinje i njihovo izumiranje, a također utječu i na vodne tokove. Voda je kao i kisik nužna za preživljavanje jer bez pitke i zdrave vode nitko ne može preživjeti. Osvještivanjem našeg lošeg djelovanja na planetu, dan planete zemlje ima za cilj zaustaviti razornu ljudsku narav koja je sklona samouništenju i uništenju svega što joj je na raspolaganju, što je priroda dala.

Zelena budućnost je prosperitetna budućnost, a ovo je trenutak da se promjeni poslovni i politički ambijent, kao i način na koji se djeluje u vezi sa klimom. Neophodna su zajednička ulaganja u planetu kako bi se očuvalo i zaštitilo zdravlje i obezbedili uslovi za život.

U građenju budućnosti svi imaju posebnu ulogu: pojedinci, preduzetnici, kompanije, inovatori i vlade, i treba da djeluju pojedinačno i zajedno. Pojedinačno, svako u svom domenu i zajedno, u globalnim naporima.